



partii naleraq

UKA2015/125

21.okt 2015

**Uunga siunnersuut: Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat.**

(Aalisarnermut, Piniarnermut Nunalerinermullu Naalakkersuisoq)

Qimminik qimuttunik kiisalu qimmeqarneq qitsuuteqarnerlu pillugit inatsisartut inatsisissaatut siunnersuut ilaatigut tuppallannartunik eqqumiitsunillu imalik oqaaseqarfiginiassavarput.

Siullermik oqaatigerusupparput qimmit qimuttut pillugit inatsisissatut saqqummiunneqartoq nunatsinni pissutsit pinngortiarlu eqqarsaatigalugit ilaatigut naleqqutsinngitsutut isikkulimmik qimmit qimuttut pillugit inatsisiliorniarneq imaallinnarlugu assut akuersaaruminaammat.

Qimmit isumannatsumik soorunami nakkutigilluarneqarlutik paarineqarlutik qimmit pigineqarnissaat pissusissamisoormat apeqqusinngilluinnaratsigu.

Aammami akuerinngivipparput qimmit paarinerlunneqarlutik ilaatigut allaat qimmit perlerlutik toqusarnerat Partii Naleqqamiit akuerinngilluinnaratsigu.

Tamakkulu pissutsit pitsaanerulissappata taava qimmit qimuttut immikkoortillugit inatsisiliortoqarnissaa piumasarissallugu tupinnartuliannngimmat tassami nunatsinni pinngortitami qimmit qimuttut uumasuupput ukiorpassuarni nunatta silaannaanut naleqqussarluarsimasut.

Pissutsit ilungersunartorujussuanngorsinnaasut qimminik qimuttunik qimmiuteqartunut imaallinnarlugit akuersarneqarnissaat isumaqatigissagipput ilimagineqassanngilaq.

Tassami assersuutigalugu qimmit qimuttut pitussimaffiini tamani illuararpassuit sanaartorneqartariaqassammata, aammalu sialummut anorimut seqinermullu illersuutinik ikkussuisoqartariaqassaaq.

Inatsisissaq akuerineqassappat nakkutigineqarsinnaanngitsumik inatsisiliornissarput piviusunngortussanngussaaq tamannalu qimmiutilinnut ilungersunartorujussuarmik kinguneqassaaq amerlasuummi inatsimmik piviusunngortinneqartumut naleqqussaaniissaminut malinnaasinnaanaviannngimmata.

Assersuutigalugu qimmiaqqat tassa erniarineqarnermiit mattusimaneqalissapput ungaluukkani illumiluunniit piumasaqaatit tamakku naammassineqassappata nunaminertanik qinnuteqartarnerit sanaartorerillu qimmiutilimmut assorujussuaq ilungersunartumik kinguneqalertussaapput.

Taamaattumik inatsisissaq nikuinnarluta akuerinngilarput kaammattuutiginiarparpullu tunuartikkallarneqassasoq aammalu qimmiutilit qimussertartullu kattuffiat peqatigalugu inatsisissamik sapinngisamik amerlanerpaat akuerisinnaasaannik nutaamik Naalakkersuisut siunnersuusiortariaqartut.

Hans Enoksen